

OKRUŽNOM SUDU U DOBOJU

Na osnovu člana 43. stav 2. tačka z) i člana 241. stav 1 Zakona o krivičnom postupku Republike Srpske, p o d i ž e m

O P T U Ž N I C U

PROTIV:

MRKONJIĆ EDI ŠIME (ranije MRKONJIĆ EDIN), rođen 1969. godine u Derventi,

ŠTO JE:

Kršeci pravila međunarodnog prava, sadržana u odredbi člana 3. stav 1 tačka a) IV Ženevske konvencije o zaštiti građanskih lica za vrijeme rata od 12. avgusta 1949. godine i odredbi člana 13. stav 2 u vezi sa članom 4. stav 1 i 2 tačka a) Dopunskog protokola uz Ženevske konvencije od 12. avgusta 1949. godine o zaštiti žrtava nemeđunarodnih oružanih sukoba od 08. juna 1977. godine (Protokol II), za vrijeme oružanog sukoba u Bosni i Hercegovini između organizovanih oružanih snaga Vojske Republike Srpske, s jedne strane, i Armije Bosne i Hercegovine i Hrvatskog vijeća odbrane (HVO), s druge strane, kao pripadnik 103. brigade HVO Derventa, u Derventi u logoru u zgradi bivšeg Doma Jugoslovenske narodne armije (Dom JNA), te u logoru u vojnom skladištu Rabić, u vremenskom periodu od aprila do kraja juna mjeseca 1992. godine narušavao tjelesni integritet, mučio i primjenjivao mjere zastrašivanja prema zatvorenim civilima srpske nacionalnosti, koji nisu bili vojno angažovani, niti su učestvovali u vojnim operacijama, na način da je:

1. tokom mjeseci april i maj 1992. godine, u logoru u vojnom skladištu (hangaru) Rabić, u više navrata fizički zlostavljao oštećene P.Č., S.Z., N.P., T.S. i G.R. na način da je iste tukao palicom, kundakom puške, rukama i nogama po cijelom tijelu, dok je oštećene Š. O., M.M., S.M., M.B. i P.S. tukao opasačem, strujnim kablom, policijskom palicom, kundakom puške, rukama i nogama po cijelom tijelu, zatim oštećenog N.S. više puta tukao rukama i nogama po cijelom tijelu, također, u više navrata šamarao oštećene B. P. i L.M., dok je jedne prilike rukama tukao oštećenog M.M., a oštećenog M.V. tukao rukama i kundakom puške, pa kada bi oštećeni od udaraca pali na pod, optuženi ih je gazio nogama, da bi i tokom juna 1992. godine, u logoru u vojnom skladištu (hangaru) Rabić, u više navrata fizički zlostavljao oštećenog B.Č., tako što je istog tukao palicom po cijelom tijelu, nanoseći im povrede tjelesnog integriteta,
2. u noći 05/06. maja 1992.godine, u zgradi bivšeg Doma JNA, zajedno sa još jednim, za sada nepoznatim pripadnikom HVO-a, fizički zlostavljao oštećenog B.M. na način da ga je iz prostorije u kojoj je bio zatvoren izveo u hodnik i pendrekom tukao po glavi, stomaku, grudima i leđima, usljed čega je oštećeni izgubio svijest, a isto tako je i sam u više navrata u logoru u vojnom skladištu (hangaru) Rabić tukao oštećenog, nanoseći mu na taj način povrede tjelesnog integriteta,

3. tokom mjeseca maja 1992. godine, u logoru u vojnom skladištu (hangaru) Rabić, u više navrata fizički zlostavljao oštećenog K.D. na način da je istog izvodio iz hangara i tukao, pa je tako neutvrđenog dana oštećenog izveo iz hangara i nožem zadao udarac u lijevu ruku, ispod ramena, nanijevši mu ubodnu ranu, zatim neutvrđenog dana, nakon što je oštećenog izveo iz hangara, istom naredio da klekne, a potom ga počeo tući palicom po glavi, dok je također više puta tukao oštećenog kundakom puške, rukama i nogama po cijelom tijelu, nanoseći mu na taj način povrede tjelesnog integriteta,
4. tokom mjeseci maj i jun 1992. godine, u logoru u vojnom skladištu (hangaru) Rabić, u više navrata fizički zlostavljao oštećenog S.Ž. na način da je istog tukao rukama i nogama po cijelom tijelu, a jedne prilike, zajedno sa još jednim, za sada nepoznatim pripadnikom HVO-a metalnom šipkom tukao oštećenog po glavi, nanoseći mu na taj način povrede tjelesnog integriteta,
5. neutvrđenog dana, u mjesecu maju 1992. godine, u logoru u vojnom skladištu (hangaru) Rabić, u prostoriji gdje se nalazilo više zatvorenih civilnih lica srpske nacionalnosti, primjenjivao mjere zastrašivanja na način da je po ulasku u hangar počeo pucati iz vatrenog oružja u plafon, usljed čega je došlo do rikošetiranja metaka, kojom prilikom je jedan metak pogodio u ruku oštećenog M.B.,
6. tokom maja i juna 1992. godine, u logoru u vojnom skladištu (hangaru) Rabić, u više navrata mučio zatvorena civilna lica srpske nacionalnosti, na način da je zajedno sa drugim, za sada nepoznatim pripadnicima HVO – a, tjerao oštećenog B.Č. ali i druge zatvorenike da se skinu goli, zatim da stave tri prsta na betonsku ploču, nakon čega je nogama na kojima su se nalazile vojničke čizme gazio po prstima, a potom iste tukao palicama po leđima,

dakle, za vrijeme oružanog sukoba, kršeći pravila međunarodnog prava, narušavao tjelesni integritet, mučio i primjenjivao mjere zastrašivanja,

čime je učinio krivično djelo ratni zločin protiv civilnog stanovništva iz člana 142. stav 1 Krivičnog zakona Socijalističke Federativne Republike Jugoslavije.

OKRUŽNI JAVNI TUŽILAC

Napomena:

„Podizanje optužnice protiv određene osobe ne znači da je ta osoba zaista i odgovorna za počinjenje krivičnog djela. Prema principu presumpcije nevinosti, svako se smatra nevinim za krivično djelo dok se pravosnažnom sudskom presudom ne utvrdi njegova krivica“.